



Siunnersuut uunga: Kalaallit Nunaannut suliffissarsiortut killilersimaarnissaat pillugu Inatsisartut inatsisaata allanngortinnissaa pillugu Inatsisartut inatsisaat (Inuit immikkut ittumik Kalaallit Nunaannut attuumassuteqartutut isigineqarsinnaanissaannut tunngatillugu piumasaqaatinik allanngineq)
(Isumaginninnermut, Ilaqutariinnut, Suliffeqarnermut Nunamullu Namminermt Naalakkersuisoq)
(Siullermeerneqarnera)

Inuiaqatigiinni atugarissaarneq maannakkorpiaq sulisussameernerup kingunerisaanik annertoorujussuarmik unammilligassaqalersimavugut. Kalerrisaarineruvoq ajortoqarujussualerneranik, isummerfigisariaqakkatsinnik. Meerartagut perorsaasunik ilinniartitsisunillu pikkorissunik amigaateqarput. Innuttaasut napparsimasut nakorsanik, peqqissaasunik allanillu peqqinnissaqarfimmi sulisunik pikkorissunik pisariaqartitsipput. Utoqqartagut isumassuisussanik amigaateqarput ataqqinartumik toqqissisimanartumillu utoqqalillutik inuunissaminnut.

Aanalu suli ajorneq, uani inissisimavugut, inuusuttagut amerlavallaat meeqqat atuarfiat naammassereeraangamikku ilinniakkamik aallartitsisannimmata. Taakkua saniatigut isiginnaaginnarpagut inuit 1.000-ingajaat, sulinnigutsut naak, suleriaannartut nalilerneqareeraluarlutik (matchgruppe 1). Soormita taamaattoqarpa? Imaassimanerpa, maannakkut Naalakkersuisuusut suliffissarsiortunut ikiorsiissutinut nutaamik inatsisiliornermigut ajornanngippallaalersissimagaa angerlarsimaannarnissaq toqqarsinnaallugu, ilinniagaqarsimannigutsutut sulilernissaq toqqarnagu? Qanorluunniit tamanna attanneqarsinnaanngilaq.

Oqaaserisanni pingaarneq unaavoq, una siunnersuut Naalakkersuisunit pissuserissaarnissamik isumagisat uniorlugit iliuuseqarnertut ippasilaarmat. Illuatungaatigut innuttaasut nunaqavissut suliffinnut suilliunneqartarnissaat qulakkeerusunneqarpoq, aappaatigullu nunani allaniit aappaasut ilinniagaqarsimannigutsutut ilinniarsimasutullu suliffinnut sulisinnissaanut malittarisassat oqilisinniarneqarlutik. Nunaqavissunik 1.000-ingajannik, suleriaannartut nalilerneqarsimasunik peqaraanni, isumaqarpunga pitsaaneroqqajaqisoq taakku ukkatarigaanni avataaniit sulisussanik piniarnissaq kisiat ukkatarinagu.

Siunnersuut taamaattumik ilimasaarutaavoq, uagut maani nunatsinni naammattunik sulisussanik peqanngitsugut imaluunniit sulinissamat piumassuseqanngitsugut, taakkulu innuttaasut imminnut tatiginerannik annikillisaataalluni nunattalu aningaasatigut ineriartorneranut siunissamullu tunniusimallutik suleqataanissaraluaat pinngitsoortinneqassalluni una siunnersuut taamatut isikkoqartillugu akuerineqassappat.

Politikkikkut aaqqiissut unaasariaqarpoq nunaqavissut piginnaasaasa qaffassarnissaat suliffinnut sulisussaaleqisunut tulluussarlugit, nunaqavissut sapinngisamik annerpaamik atorluarumallugit. Taamatutaaq inoqatitsinnut, suliffinnik tigusiumannigutsunut, angerlarsimaannarusuttunullu allat akiligaannik, sakkortunerujussuarmik kinguneqartitsisariaqarpugut.



Naalakkersuisut kommunillu ilinniakkanik piginnaangorsaanermillu ukkatarinninnerujussuusariaqarput, suliffissaaleqisut sapinngisamik annertunerujussuarmik, suliffeqarfinni piumaneqartunut suliffinnut sulisussaaleqisunut tulluusaallutik. Taamaaliornerup qulakkiissavaa, suliffissaaleqisut pisariaqartitanik piginnaasaqalernissaat suliffissat, inuttassarsiuussat nunaqavissuniit tiguneqartalerlutik. Suliniarnermi tassani aamma inuit 200 sinnilaarlugit amerlassusillit, matchgruppe 2-mi inissisimasut taamaattumillu sulilernissamat piareersartariallit ilanngunneqartariaqarputtaaq.

Junimi ukioq manna ataatsimiititaliaq ilaasortaaffigisara angalaneranut atatillugu, Qeqqata Kommuniata atugarissaarnermut ingerlataasa ilaat pulaarparput. Tassani paasineqarsimavoq, utoqqarnik isumassuinermi piginnaangorsaqqiineq iluaqutaasimasoq, tassa nunaqavissunik suliinnartitsinissamat sulilersitsinissamullu ilinniarsimangitsunik persiarfissat annertusineqarsimammata. Suliniutit taamatut ittut ukkatarinerusariaqarpagut.

Demokraatinut erseqqissassallugu pingaartuuvoq, uagut kalaallit nunatta aningaasaqarneranut ineriartorneranullu annertunerusumik akisussaaffimmik tiguisariaqartugut. Tamanna ikorfartorneqarsinnaavoq ileqquliussinikkut, aningaasaqarnikkut inuuniarnikkullu suliffeqarnerup pilerinarsarneratigut aammalu inuiaqatigiit ineriartornerannut peqataalluarnikkut.

Avataaniit sulisussanik aallerneq aatsaat pisariaqarpoq, pisariaqarluinnarpat aammalu, nunaqavissut sulisut suliffinnut sulisussarsiortunut periarfissat tamaasa atorlugit neqeroorfigineqareerpata. Taamaaliornerup qulakkiissavaa, avataaniit sulisussarsiorneq isumalluutigilissanngikkipput akerlianilli sukataarluta uagut nammineq innuttaasoqatitta piginnaasaat aallaavigissagigut.

Taamatulli oqareerlunga naqissuserusuppara, uagut Demokraatiniit avataaniit sulisussarsiorneq akerlerinnginnatsigu. Avataaniit sulisoqarneq allatut ajornartumik pisariaqarsinnaasarpoq, nunatsinni nunanilumi allani. Isumaqarluinnarpugulli, nunaqavissut tunniussinnaasaat salliuttuaannartariaqaripput. Taamaaliornerup maani nunatsinni aningaasatigut inuuniarnikkullu namminiilerneq nukittorsassavaa qulakkerlugulu, innuttaasut nunatta ineriartorneranut annerpaamik iluaqusiinissaat.

Taamatut oqareerluta, soorunami avataaniit sulisussarsiornerup sukkanerusumik eqaannerusumillu pisarnissaanik kissaat tapersorsorparput. Pisariaqanngitsumillu allaffissornerujussuup atorunnaarsinneqarnissaa isumaqatigiuaannarparput, uani siunnersuummi anguniarneqartoq.

Naggataatigut Naalakkersuisup Siulittaasuata ammaanersiorluni oqalugiarnermi ersarissumik imminut assortorluni oqaaseqarnera oqaasertalilaartariaqarparput. Tassanimi oqarmat, uagut nammineerluta ineriartornermut akisussaaffik tigussagipput. Siunnersuummut uunga naapertuutinnngilluinnarpoq, toqqaannartumik siunertaamat avataaniit suliartortut aapparisaasa ilinniagaqarsimangitsulluunniit sulilersinneqarnissaannik siunertaqarmat. Tamanna nunaqavissunut suliffissarsiortunut pinngitsoorani kigunerlutsitsisussaavoq. Taamaattumik siunnersuut una ineriartornerup pitsaanngitsumik annertusineranik kinguneqaratarsinnaavoq, uagut nunaqavissutut nunatsinni ineriartornermut isiginnaartunngortilluta. Tamanna akuersaarneqarsinnaanngilaq.



Taamatut oqaaseqarluta siunnersuut ataatsimiititaliami susassaqartumi suliareqqinneqarnissaa innersuussutigaarput.